



Broj/Broj: 01/6-50-1-6-26/06
Sarajevo/Sarajevo: 06.07.2006.godine

Z A P I S N I K
26. sjednice Komisije za saobraćaj i komunikacije,
održane 06.07.2006. godine

Sjednica je održana 06.07.2006., s početkom u 16,00 sati.

Sjednici su prisustvovali članovi Komisije:

- | | |
|-------------------------------------|---------------------|
| 1. Miloš Jovanović, predsjedavajući | 6. Milorad Živković |
| 2. Ivo Lozančić | 7. Selim Bešliagić |
| 3. Ruža Sopta | |
| 4. Adem Huskić | |
| 5. Izet Hadžić | |

Sjednici nisu prisustvovali: Nenad Mišić i Muhamed Moranjkić.

U ime Vijeća ministara BiH sjednici su prisustvovali Nikola Šego i Zdravko Šavija. Sjednicu su pratili Maja Ribar i Jelena Sesar, predstavnici OHR-a i Simone Ginzburg, predstavnik Projekta reorganizacije sudova za prekršaje Visokog sudskog i tužilačkog vijeća BiH. Sjednici je prisustvovao i privremeni sekretar Komisije Ahmed Jalovičić.

Predsjedavajući Miloš Jovanović predložio je sljedeći

D N E V N I R E D

1. Verificiranje Zapisnika 25. sjednice, održane 06.03.2006.godine,
2. Prijedlog zakona o Agenciji za informaciono društvo Bosne i Hercegovine, predlagač Vijeće ministara BiH,(na 74. sjednici Predstavničkog doma usvojen je zaključak da se Izvještaj o Zakonu vrati Komisiji na dopunu i da Komisija podnese Domu novi izvještaj)
3. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, predlagači poslanici Selim Bešliagić, Mirsad Ćeman i Beriz Belkić,
4. Informacija i zaključci sa Javne rasprave o Projektu "Autoput na koridoru 5C",
5. Ostala pitanja.

Dnevni red jednoglasno je prihvaćen.

Ad. 1.

Na prijedlog Zapisnika nije bilo primjedbi,pa je Komisija jednoglasno verificirala Zapisnik 25. sjednice održane 06.03.2006.godine.

Ad.2

Predsjedavajući je podsjetio prisutne da je Prijedlog zakona o Agenciji za informaciono društvo Bosne i Hercegovine duže od godinu dana u proceduri, jer su Vijeće ministara BiH i Ministarstvo komunikacija i prometa svojom neaktivnošću doprinijeli nejasnoćama i dilemama vezanim za Prijedlog zakona, te da je na 74. sjednici Predstavničkog doma usvojen zaključak da se izvještaj na Prijedlog zakona vrati Komisiji i da Komisija sačini novi izvještaj. Ukazao je na činjenicu da je 28.02.2006.godine održan sastanak u kabinetu predsjedavajućeg Vijeća ministara, kada je predstavnicima Komisije obećano da će Vijeće dostaviti mišljenje o amandanima, ali je tek osmogog jula dostavljena obavijest Vijeća ministara BiH da su razmatrali amandman na član 28. Prijedloga zakona, kojim je predloženo da se pomenuti član briše, te da je Vijeće ministara BiH zaključilo da ostaje pri Prijedlogu zakona koji je ranije dostavljen Parlamentarnoj skupštini BiH. Nakon toga, Komisija je jednoglasno podržala principe Prijedloga zakona o Agenciji za informaciono društvo Bosne i Hercegovine.

Predsjedavajući je istakao da su na predloženi zakon amandmane uložili poslanici: Momčilo Novaković, Adem Huskić i Miloš Jovanović, te otvorio raspravu o amandmanima, kako slijedi:

AMANDMAN 1. (MILOŠ JOVANOVIĆ)

U stavu (1) člana 3., iza riječi "Agencija je" briše se riječ "samostalna", a iza riječi "organizacija" dodaju se riječi: "u sastavu Ministarstva komunikacija i prometa", a ostali tekst ostaje isti.

Amandman nije usvojen.

AMANDMAN 2. (ADEM HUSKIĆ)

U članu 3. stav (3) riječi :

"Ministarstvo komunikacija i prometa Bosne i Hercegovine " zamjenjuju se riječima: "Ministarstvo civilnih poslova Bosne i Hercegovine".

Amandman nije usvojen.

AMANDMAN 3. (MILOŠ JOVANOVIĆ)

Iza člana 3. dodaje se novi član 3a), koji glasi:

"Sjedište Agencije je u Banjoj Luci."

Amandman nije usvojen.

AMANDMAN 4. (MILOŠ JOVANOVIĆ)

U stavu (1) člana 8. , iza riječi "uprave, " dodaju se riječi: "upravnim organizacijama, a tekst u nastavku rečenice ostaje isti.

Amandman je jednoglasno usvojen.

AMANDMAN 5. (MILOŠ JOVANOVIĆ)

U stavu (1) člana 8. , brišu se tačke j) i l).

Amandman nije usvojen.

AMANDMAN 6. (MILOŠ JOVANOVIĆ)

U stavu (6) člana 8., na početku prve rečenice, iza riječi "Agencija" brišu se riječi: "na zahtjev nadležnih ministarstava".

U istom stavu (6) člana 8. briše se druga rečenica u cijelosti.

Amandman nije usvojen.

AMANDMAN 7. (MILOŠ JOVANOVIĆ)

U stavu (7) člana 8., riječ "produkcije" zamjenjuje se riječju "izrade", a iza riječi personalizacije stavlja se tačka i briše se tekst „i distribucije, i to:“ , kao i tačke od a) do p) u cijelosti.

Amandman je jednoglasno usvojen.

AMANDMAN 8. (MILOŠ JOVANOVIĆ)

U stavu (1) člana 9. briše se posljednja rečenica u cijelosti, a ostali tekst ostaje isti.

Amandman je jednoglasno usvojen.

AMANDMAN 9. (MOMČILO NOVAKOVIĆ)

U stavu (2) člana 12. , ispred riječi "Ministarstva", dodaju se riječi: "Vijeća Agencije i", a ostali tekst ostaje isti.

Amandman je jednoglasno usvojen.

AMANDMAN 10. (MOMČILO NOVAKOVIĆ)

Iza člana 12. dodaje se novi član 12a), koji glasi:

"(1) Agencija ima Vijeće, koje vodi Agenciju u pogledu strateških pitanja implementacije zakona, te vrši konsultacije s direktorom i prima od njega izvještaje. Vijeće Agencije usvaja kodeks rada Agencije. Osim toga, Vijeće Agencije ima funkciju apelacionog tijela za odluke koje donosi direktor.

(2) Vijeće Agencije sastoji se od sedam članova koji se imenuju na osnovu ličnih sposobnosti kao pojedinci koji imaju pravno, ekonomsko, tehničko ili drugo relevantno iskustvo i stručnjaci su u oblasti IKT. Vijeće Agencije čine po dva člana iz reda konstitutivnih naroda i jedan član iz reda ostalih.

(3) Članovi Vijeća Agencije imenuju se na period od četiri godine i mogu biti ponovo imenovani samo na još jedan mandat. Članovi Vijeća Agencije biraju predsjedavajućeg iz svojih redova. Vijeće Agencije sastaje se najmanje četiri puta godišnje.

(4) Direktor Agencije, njegov zamjenik i predsjednik Vijeća Agencije moraju biti iz reda različitih konstitutivnih naroda.

- (5) Direktor Agencije podnosi izvještaj Vijeću Agencije o strateškim pitanjima rada Agencije. Direktor Agencije prisustvuje svim sastancima Vijeća Agencije bez prava glasa.
- (6) Članove Vijeća Agencije imenuje Parlamentarna skupština BiH, na prijedlog Vijeća ministara BiH, na osnovu liste kandidata koju je nakon provedene procedure javnog konkursa utvrdilo Ministarstvo, koja će sadržavati dvostruko više kandidata od raspoloživih mjesta.
- (7) Parlamentarna skupština BiH prihvata ili odbacuje predložene kandidate u roku od 30 dana nakon podnošenja prijedloga. Ako Parlamentarna skupština BiH odbaci prijedlog, Vijeće ministara BiH predlaže drugorangirano lice s liste kandidata koju je utvrdilo Ministarstvo i podnosi taj prijedlog Parlamentarnoj skupštini BiH.
- (8) Zvaničnici na zakonodavnim ili izvršnim funkcijama na svakom nivou vlasti, ili članovi tijela političkih stranaka ne mogu se kandidirati za članstvo u Vijeću Agencije.
- (9) Članovi Vijeća Agencije moraju prijaviti svaki interes koji imaju u djelokrugu rada Agencije i izuzimaju se u slučajevima koji predstavljaju sukob interesa."

Amandman je jednoglasno usvojen.

AMANDMAN 11. (MILOŠ JOVANOVIĆ)

U tački b) člana 16. , riječi "razvoja informacionog društva;" zamjenjuju se riječima: "IKT;".
U tački c) člana 16., iza riječi "poslovima" stavlja se tačka a preostali tekst ove tačke briše se.

Amandman je jednoglasno usvojen.

AMANDMAN 12. (MOMČILO NOVAKOVIĆ)

U tač. c) i d) člana 18., ispred riječi „Ministarstva“ dodaju se riječi „Vijeća Agencije i“, a ostali tekst ostaje isti.

U tački g) člana 18. briše se tačka i dodaju se riječi „ Vijeća Agencije i Ministarstva.“

Amandman je jednoglasno usvojen.

AMANDMAN 13. (MILOŠ JOVANOVIĆ)

U članu 24. mijenja se naslov i glasi:

„(Eksterna ocjena rada Agencije)“.

U stavu (1) člana 24. , iza riječi „Agencija“ riječi: „dužni su da:“ zamjenjuju se riječima: „će s ciljem osiguranja kvaliteta rada Agencije postupati kako slijedi:“.

U tački a) stava (1) člana 24., riječi „bez odgađanja“ zamjenjuju se riječju „pravovremeno“ , a ostali tekst ostaje isti.

Amandman je jednoglasno usvojen.

AMANDMAN 14. (MOMČILO NOVAKOVIĆ)

U stavu (1) člana 25., ispred riječi „nevladinih organizacija“ dodaju se riječi: „entitetskih i institucija Brčko Distrikta,“ a ostali tekst ostaje isti.

Amandman je jednoglasno usvojen.

AMANDMAN 15. (MOMČILO NOVAKOVIĆ)

Stav (2) člana 26. briše se.

Amandman je jednoglasno usvojen.

AMANDMAN 16. (MOMČILO NOVAKOVIĆ)

U stavu (2) člana 27., ispred riječi „Ministarstva“ dodaju se riječi „Vijeća Agencije i“ a ostali tekst ostaje isti.

Amandman je jednoglasno usvojen.

AMANDMAN 17. (MOMČILO NOVAKOVIĆ)

Član 28. se briše.

Amandman nije usvojen.

Nakon usvajanja navedenih amandmana ,Komisija je :

1.većinom glasova prihvatila tekst Prijedloga zakona o Agenciji za informaciono društvo Bosne i Hercegovine s usvojenim amandmanima,

2. konstatirala da je predloženi Zakon neophodno donijeti, te predlaže Predstavničkom domu Parlamentarne skupštine BiH njegovo usvajanje.

Na osnovu člana 89. Poslovnika, Komisija je za izvjestioca odredila predsjedavajućeg Komisije Miloša Jovanovića.

Ad. 3

Milorad Živković smatra da Komisija treba da se odredi prema mogućnosti stopiranja primjene Zakona o osnovama sigurnosti saobraćaja na putevima u BiH i da Zakon stupi na snagu od 01.01.2007.godine.

Na traženje predsjedavajućeg da iznese stav o navedenom, Nikola Šego je istakao da su formirane radne grupe za izradu pravilnika i da je rok za njihovo donošenje godina dana od dana objave Zakona, a u roku od šest mjeseci treba da se usklade propisi na nižim nivoima sa Zakonom, pa nema potrebe da se odgađa primjena Zakona.

Adem Huskić je istakao da razumije stav gospodina Živkovića, ali je mišljenja da zaključak o odgađanju primjene Zakona treba da donese Predstavnički dom.

Milorad Živković je ukazao na činjenicu da je Zakon obiman i komplikovan, da su podzakonski akti ti koji određuju sam vid Zakona, te podsjetio da Komisiji nisu dostavljeni pravilnici, pa je potrebno donijeti odluku o primjeni Zakona od 01.01.2007.godine.

Predsjedavajući je naglasio da je suština izmjena i dopuna ovog prijedloga Zakona jesu kazne i podsjetio da su prilikom rada na usaglašavanju Zakona o osnovama sigurnosti saobraćaja na putevima u BiH predstavnici Predstavničkog doma napravili ustupak radi usvajanja Zakona i prihvatili amandmane Doma naroda koji predviđaju blaže kazne.

Selim Bešliagić je istakao da je u razgovorima sa sudijama za prekršaje upoznat da zbog propisanih novčanih kazni Zakon gubi na snazi, naročito zbog pojedinaca koji učestalo krše propise, pa smatra da je potrebno pooštriti kazne.

Simone Ginzburg je ukazao na činjenicu da je cilj radne grupe čiji je član, jeste usklađivanje zakona na nivou BiH sa entitetskim zakonima o prekršajima, pa je u tom smislu i prijedlog njihovih amandmana na Zakona o osnovama sigurnosti saobraćaja na putevima u BiH. Smatra da je bitno da ukoliko vozač ima neplaćenu novčanu kaznu ne može registrovati vozilo i produžiti vozačku dozvolu, kao i da treba omogućiti primjenu instituta sudskog naloga, te predlaže da radi ubrzanja procedure, neko od poslanika preuzme ove amandmane.

Ruža Sopta smatra da bi trebalo prolongirati primjenu Zakona, jer bi došli u situaciju da je Zakon na snazi, ali se ne može provoditi.

Na upit predsjedavajućeg da li su u Ministarstvu razmatrali mogućnost odgode primjena Zakona, Šego je odgovorio da nema potrebe odgađati primjenu Zakona, te napomenuo da do donošenja novih pravilnika važe stari pravilnici.

Milorad Živković je ukazao na činjenicu da nije ispoštovan dogovor da se Komisiji dostave pravilnici, te da će podnijeti Prijedlog zakona kojim se mijenja član 256. i da Zakon stupa na snagu sa danom donošenja pravilnika.

Izet Hadžić smatra da se samo pojedini pravilnici trebaju dostaviti Komisiji i da se ne slaže sa povećanjem kazni, jer bi prethodno trebalo analizirati važeće prekršaje, kao i rad sudova.

Selim Bešliagić je istakao da zbog svega navedenog, predlaže da se za Prijedlog zakon čiji je on predlagač, zatraži od Kolegija produženja roka komisijske faze od petnaest dana, što je Komisija jednoglasno prihvatila. zakona.

Predsjedavajući je zaključio raspravu o ovoj tački dnevnog reda, te predložio usvajanje sljedećih zaključaka:

1. Traži se od Vijeća ministara BiH da dostavi Komisiji mišljenje da li je potrebno odgoditi primjenu Zakona o osnovama sigurnosti saobraćaja na putevima u BiH, odnosno li se Zakon može primjenjivati bez poteškoća s obzirom na obaveze iz člana 252. i 255. Zakona o osnovama sigurnosti saobraćaja na putevima u BiH.

2. Traži se od Vijeća ministara BiH da dostavi Komisiji mišljenje o Prijedlogu zakona o izmjenama i dopunama Zakona o osnovama bezbjednosti saobraćaja na putevima u BiH, predlagači poslanici Selim Bešliagić, Mirsad Ćeman i Beriz Belkić, kao i o prijedlozima amandmana na Zakon o osnovama sigurnosti saobraćaja na putevima u BiH, koje je Komisiji uputilo Ministarstvo pravde BiH.

Komisija je jednoglasno usvojila navedene zaključke.

Ad. 4

Predsjedavajući je ukazao na činjenicu da je u periodu od održavanja Javne rasprave bilo aktivnosti oko Projekta Koridora 5c, pa bi bilo korisno da predstavnik Ministarstva informiše Komisiju o učinjenom, te zadužio privremenog sekretara Komisije da pripremi prijedlog zaključaka sa Javne rasprave za sljedeću sjednicu.

Nikola Šego je upoznao prisutne da su idejni projekti završeni, da će fizibiliti studija biti gotova 26.-og jula, da je raspisan je Javni poziv za izražavanje interesa, u toku su aktivnosti na izradi Prijedloga zakona o cestama i ovim se Prijedlogom predviđa institucija koja bi vodila aktivnosti

oko izgradnje Koridora 5c. Obzirom da je prostorno planiranje i građenje u nadležnosti entiteta, mišljenja je da bi bilo korisno da Ministarstvo civilnih poslova BiH koordinira aktivnosti na realizaciji urbanističke i građevinske dozvole za Koridor 5c.

Ad. 5

Milorad Živković je predložio da se se uputi dopis Vijeću ministara BiH da u roku od sedam dana dostave mišljenje u vezi zahtjeva za autentično tumačenje člana 23. Zakona o Javnom radiotelevizijskom sistemu, kako bi na sljedećoj sjednici Komisije mogla utvrditi Prijedlog autentičnog tumačenja. Komisija je jednoglasno prihvatila prijedlog.

Na prijedlog Izeta Hadžića, Komisija je usvojila sljedeće zaključke:

1. Traži se od Vijeća ministra BiH informacija o dosadašnjim aktivnostima vezanim za Jadransko-jonsku cestu, kao i planiranim aktivnostima za tekuću godinu.
2. Traži se od Vijeća ministra BiH informacija o dosadašnjim aktivnostima vezanim za most kopno-Pelješac, kao i planiranim aktivnostima za tekuću godinu.

Sjednica Komisije završena je u 17,55 sati.

PRIVREMENI SEKRETAR KOMISIJE
Ahmed Jalović

PREDSJEDAVAJUĆI KOMISIJE
Miloš Jovanović